



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 8



Modi-i US semdangba sülen Delhi tonga aruogo



Germany nung Angela Merkel melentsü election agir

VOL. XVIII NO. 345 (ADOK 345) DIMAPUR

TENTONÜ (MONDAY)

RONGJUI (SEPTEMBER) 27, 2021

₹ 5.00

COVID-19 Nagaland: 48 taneptsü angu & 31 dak putet

Kohima, September 26, 2021 (TYO): Nagaland nung Deobarnü COVID-19 puteter dang nungibo taneptsü angur teimba liasü. Tanü nisung 48 taneptsü angu aser 31 dak putet.

"Tesüiba ghonda 24 tsüingda COVID-19 puteta alir nisung 48 taneptsü angu. Parnokji Tuensang nung 21, Dimapur nung 11, Kohima nung 9, Kiphire, Peren oPhek nung anana (2) aser Mokokchung nung 1 lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

Kasa mapang nisung 31 dak COVID-19 aliba putet. Parnokji Dimapur nung 19, Kohima nung 9, Tuensang nung 2 aser Mokokchung nung 1 lir, ta paisa ashi.

Nisung 31,150 rongnungi 29,062 taneptsü nguogo aser ibaji 93.29% lir, ta paisa shisem.

Tang nisung 445 anepaludar saka parnok 341 dakbo shirangba yimya kecha mali, ta Dr Kikon-

isa metetdaksü.

Tang tashi nung COVID-19 alitsü akok ta temolung melemi bilemba sample 367,993 tendangogo. RT-PCR ajanga 109,270, TrueNat ajanga 82,236 aser Rapid Antigen Test ajanga 176,487 tendang, ta Dr Kikon-isa ashi.

"Honibar tashi nung nisung 683,316 nem COVID-19 vaccine indang dose 10,19,604 agütsüogo" ta State Immunization Officer, Dr Ritu Thurr-i metetdaksü.

Vaccine agirtemji frontline workers 60,919, healthcare workers 15,995, arishi küm 45 ser temapur 197,360 aser arishi küm 18 nungi 44 tsüingda alir 409,042 lir, ta paisa ashi.

Vaccine agirtem rongnungi nisung 336,288-i dose anaprong agiogo. Parnokji frontline workers 47,205, healthcare workers 13,238, arishi küm 45 ser temapur 133,014 aser arishi küm 18 nungi 44 tsüingda alir 142,831 lir, ta Dr Thurr-isa ashi.

Taküm Oct tashi nung Mangkolemba gari lenmang yanglutsü akhanger

Dimapur, September 26, 2021 (TYO): Mangkolemba nungi Longnak nung Mariani-Mokokchung road (NH702-D) den sendaktepba gari lenmang October 2021 tashi nung black top asütsü atema takhangba agütsüogo.

Iba takhangba ya Mangkolemba Ao Lanur Telongjem (MALT), Jangpetkong, Japukong aser Tzurangkong Hoho tem den kaketshir teloktem, All Ward Chairman Association of Mangkolemba, Watsü Mungdang Mangkolemba aser Mangkolemba Town Students Union (MTSU) teloktemi state sorkar nem agütsü.

Parnoki taküm October ita tashi nung iba gari lenmang ASPHALT (Black Top) asütsü.

kilentzü aodak yanglutsü aser apu tejentem melena tasen yanglutsü takhangba agütsüogo.

Mangkolemba Town ya Mokokchung district kübok tzükong asem- Jangpetkong, Japukong aser Tzurangkong indang Sub divisional headquarter ka lir.

Mangkolemba sub-division ya kilometre 11 gari lenmang agi Longnak nung Mariani-Mokokchung road (NH702-D) den sendaktepa lir aser iba lenmang nung yim aika sendaktepa lir.

1986 küm mezüing atema iba lenmang nung black topping ao aser iba sülen nungi khen danga meyanglushi arur. Iba ajanga tanü gari lenmang ayong ama kümogo aser ano apu aika tachir dang lir.

"Mangkolemba nung Civil Society temi aiben state sorkar dangi iba khuret lemsatepa shidi züluogo aser osangkakettem nunga adokogo. Ajisüaka, tang tashi mapa kechi meinyaker aser sorkari hao ta mali toktsür. Anungji taküm October ita tashi nung gari lenmang meyanglura onoki lungkak aittsü aser iba tebilemstü khuretji state sorkari abentsü" ta MALT, Jangpetkong Hoho, Japukong Hoho, Tzurangkong Hoho, Jangpetkong Students Conference, Japukong Students Conference, All Ward Chairman Association Mangkolemba, Watsü Mungdang Mangkolemba aser Mangkolemba Town Students Union Tirtemi sorkar dang shiogo.

Bank union nungi tenzüker Opposition pary temi tanü 'Bharat bandh' nungiter

New Delhi, September 26, 2021 (Agencies): Samyukt Kisan Morcha (SKM)-i September 27 nü Bharat Bandh ayongzüka agitsü. Iba ya Parliament nung Farm law 3 agizükba sülen küm ka ajungba tenüing nung amonger.

Opposition telok aikati Bharat Bandh pusemba osang metetdaksüogo aser Punjab Chief Minister Charanjit Singh Channi aser Bihar Assembly Leader of Opposition Tejashwi Yadav natia pusemba shiogo.

Andhra Pradesh aser Tamil Nadu state sorkartemia linük ajanga mokdangba pusema nungiter ta metetdaksüogo aser Congress-i shilem agitsü nangzükogo.

Asüngnep 6:00 ako nungi nikongdang 4:00 ako tashi Bharat Bandh alitsü aser iba mapang

sorkar aser nija office tem, shisaliok aser tanga rejutem shibangtsü.

Bharat Bandh nungsa dokan, industry, shishilembadak ajak shibangtsü aser linük ajungalen public sentong kecha magitsü.

Ajisüaka, emergency establishments aser essential services bo tenokdangba kübok madener. Bandh ji timi dang agitsü, ta SKM-i metetdaksüogo.

Samyukta Kisan Morcha-i ayongzüka September 27 "Bharat Bandh" nung Congress-i shilem agitsü ta metetdaksüogo.

"Tesüiba küm 7 tsüingda Narendra Modi'er sorkari agriculture sector nung timtem agüja arur. 2014 küm Modi'er sorkari Land Acquisition Ordinance yanglu saka parnoki iba bill yutsütsüsa aküm" ta

Congress party spokesperson Gourav Vallabh-i ashi.

"Modi'er sorkar ajanga farm sector nung takoksa bentsür aruogo. Delhi arrtsü nung kita tugu tashi aluyimertemi tasü itta lungkak aita aruba parnok mangur. Iba lungkak aita sentong nung aluyimer 600 tashi süogo saka sorkari farm laws indang mejembir" ta Vallabh-isa ashi.

All India Bank Officers' Confederation (AIBOC)-ia Hombarnü Bharat bandh pusema nungitba metetdaksüogo.

AIBOC-i sorkar dang aluyimertem den olemteptsü aser Farm laws 3 meyipa agitsü atema mepishia metetdaksüogo.

AIBOC aser state unit temi Hombarnü linük ajungalen aluyimertemi lungkak aita nung yariteptsü, ta parnokisa ashi.

Sao Chang (Govt) College ali atsünga agir: ENCSU



September 25, 2021 nü ENCSU-i anir Sao Chang (govt) College indang ali repringdanga senzüba yangi noksa nung angur.

Dimapur, September 26, 2021 (TYO): Eastern Nagaland College Students' Union (ENCSU)-i Tuensang Sao Chang (Govt) College indang ali atsünga agiba khuret repringshimogo.

1992 küm Directorate Higher Education ajanga survey map nung college indang aliji acre 48.24 liasü ta shia lir saka tang ali atsünga agiba ajanga ali acre 38 dang kümogo, ta ENCSU-i ashi.

September 25, 2021 nü ENCSU-i District administration Tuensang, Confederation of Chang Students' Union, C-Khel Tuensang Village, College ketdangsurtem aser College Students' council den külemi Sao Chang (govt) College indang ali repringdanga liasü.

Iba mapang nisungtemi college indang ali atsünga agiba angu aser iba ajanga Eastern Nagaland nung college tejentiba nung terenlok mapa meinyakteter, ta ENCSU President Serichum J Sangtam aser Tongti Tezülur Sanglekhamba C Chang nati sangdong ka nung ashi.

Iba dak sendakba nung sendaktepa alirtem aser public-i ENCSU den tatem tashi yariteptsü mepshir ta parnokisa ashi.

District Administration, C-Khel Tuensang village, Confederation of Chang Students' Union, College ketdangpurtem aser kijatemi onok den yaritepba atema pelar, ta ENCSU mendenpurtemisa metetdaksü.

Andhra Pradesh aser Odisha-i Cyclone Gulab atema renemer

New Delhi, September 26, 2021 (Agencies): India Meteorological Department (IMD)-i cyclone Gulab nungi kümdanga alitsü osang sangoktsüba sülen Andhra Pradesh aser Odisha tem nung relief & rescue maparen renemogo.

Ita pezü tejakdang Odisha nung Cyclone Yaas süiba sülen

ano tang Gulab süitsü aliba nungi kümdangtsü metetdaksüogo.

Deobarnü cyclone ji Andhra Pradesh atongtsü ta IMD-i ashi aser iba atema parnok north Andhra Pradesh aser south Odisha nung 'orange alert' agütsüogo.

IMD-i kümdangtsü osang sangoktsüba sülen Andhra

Pradesh aser Odisha nung relief & rescue maparen renemogo. National Disaster Response Force (NDRF), Odisha Disaster Rapid Action Force (ODRAF) aser SDRF teams cyclone süitsü akok ta asüba tesemtem nung mapa lemkükja lir.

National Crisis Management Committee (NCMC)-ia cyclone Gulab indang osang agitepogo.

JEE Advanced 2021 Admit card sayaogo

New Delhi, September 26, 2021 (Agencies): Joint Entrance Examination (JEE) Advanced 2021 admit card sayaogo. Candidate temi jeeadv.ac.in nungi admit card download asütsü akok.

JEE Advanced 2021 ya October 3, 2021 nü Indian Institute of Technology (IIT), Kharagpur ajanga ketdangsüa agitsü aser October 15 nü JEE

Advanced 2021 indang result metetdaksütsü.

JEE Advanced 2021 Admit card ali nung dang exam hall telungi aitsü akok.

JEE Advanced ya papers 2 atema agitsü aser paper shia ghonda asemsem angutsü. Tatidangji computer-based test (CBT) mode nung dang agitsü.

September 15, 2021 nungi

JEE Advanced 2021 atema registration tenzüker aser lakh 2.5 atongba Indian candidate tem - IIT entrance - JEE Advanced agütsütsü melar.

National Testing Agency (NTA)-i September 14-15 aonung JEE Main result 2021 indang results metetdakja liasü aser iba nung candidate 44-i 100 percentile aser candidate 18-i AIR 1 nguteta liasü.

DALT office atema tenla agütsür ajak dang pelar



Dimapur Ao Lanur Telongjem (DALT) office mesemtetba sentong nung Wb. Limasunep Jamir IPS, IGP (Range) Nagaland-i tajungshi O jembidang agiba noksa angur.

Dimapur, September 26, 2021 (TYO): Dimapur nung Aor lanurtem telok ka tentetsü nüngdak ta lennirtemi shisateta 2012 küm Dimapur Ao Lanur Telongjem (DALT) tenteta liasü. Iba mapang nungi tenzüker DALT-i Dimapur nung Aortem atema dang masü saka Naga nungger ajak atema ochi aser temeten asoshi inyaka arudang tangari tatishitsü tajung agitsüsa mapa aika takok ngua inyaktetogo. Küm 9 tashi süia arur September 25, 2021 nü Naga

ayongzüik. "Dimapur nung Aor lanurtemi Aor atema dang masü saka Naga nungger ajak atema longjemer inyaka aotsü aser teti ochi nung noktaksü" ta Aotemsu-isa ashi. DALT office mesemtetba sentong nung Wb. Limasunep Jamir IPS, IGP (Range) Nagaland-i tajungshi O jembidang agiba noksa angur. DALT office mesemtetba nung yaritepertem:

1. Wb. Limasunep Jamir IPS (Changtongya) : AC 1 No.
2. DAYO Signal Unit : Steel Almirah 1 No.
3. Diphupar Ao Baptist Arogo : Rs 50,000/-
4. DAYO Aoyimti Unit : Rs 5000/-
5. DAYO Diphupar B Unit : Rs 1000/-
6. Mr & Mrs S. Mar Aier (Mopungchuket) : Rs 30,000/-
7. Dr & Mrs Michael Imti Imchen (Longjang) : Rs 2000/-
8. Er & Mrs J. Walter Longchar (Nokpu) : Rs 10,000/-
9. Mr & Mrs Yarmong (Ungma) : Rs 10,000/-

Pandit Deendayal Upadhyay asoba anogomung amung



Dimapur, Rongjui/Sept. 26 (TYO): BJP tentetsang Pandit Deen Dayal Upadhyay sor küm 105 ajungba anogomung bilemteta Minority Morcha BJP Nagaland puri Rotary Club Hall, Dimapur nung September 25, 2021 nü sentong ka state secretary Sanjay Dey lenisüba kübok agia liasü. Minority Morcha BJP Nagaland state tir Deep Kumar-i sentong nung adener pela agizükba o jembidang aser state vice president Ravinderjit S. Panesar-i Pandit Deen Dayal Upadhyay takum otsü tejangja lemsatapa liasü. BJP Nagaland indang Founder Member Doodh Singh-ia Upadhyay indang jembidang aser Brij Kishore Rai-ia jembidang liasü. Anita Roychowdhury ajanga melepzüng o jembidang. Iba sentong nung Morcha indang state office bearers aser state executive züngsemtem aika arua aden

aser parnoki Upadhyay nem akum agüja naro inoktsü. Iba sülen parnoki Sevak, Dimapur nung aliba Neighborhood Children Ministry orphanage semdanga Rev. Daniel-i Tsüngrem temoatsü meshia sarasadem aser yangji aliba tanurtem nem nanglong lema agüja liasü. Iba mapang tir Deep Kumar aser state indang senior BJP lenir Doodh Singh nati o jembidang liasü.

Kohima nung Security Forces temi nisung tenet apu



Dimapur, Rongjui/Sept. 26 (TYO): Security Forces temi September 25, 2021 nü police den lungjemer general area Paramedical Colony, Kohima nung operation ka agiba mapang nisung tenet apu aser parnok ket nungi ozüng alema bena aliba

Areca Nuts (kozü) truck asem nung pua liasü. Osang tejangja ka angazükba sülen Security Forces temi State Police den lungjemer operation ka agiba mapang nisung tenet ya apu aser sen crore 1.58 jenjang kozü ton 264 (bag 330 shia

OFFICE OF THE
AO SENDEN
"Nübur Asashi" (For the People)

Date: 26-09-2021

SANGDONGER

September 14, 2021 anogo Wb. Aowati (Molungkimong) GB Yimyu Ward pai meimchir aser sobaliba nung maketba mapa tamajung aser taochi makai Wt. Easter Phom, Wb. Imtioza (Mangmetong) kinungtsü tepsetba anema Ao sünak abener ajak tenung nung Ao Sendeni kukua aitsür. Iba keno bushitsü atema SDPO Mokokchung Wb. Chuba Chang arkhudong sür Special Investigation Team (SIT) tenteter tekaratiba nung aibelener puteta nübur tsüngdang sangdongba atema Mokokchung Police nem tenüngsang agütsür. Nisung tepseter anema ozüngi mela aliba ama ozüng amer pangtak puri tapet temerenshi agütsütsu Ao Sendeni akanger.

Sd/- (CHUBAWATI LONGCHAR) President	Sd/- (IMTIPOKYIM) Secretary
--	--

Jakhama nung Gym & Fitness Centre ka lapokogo



Jakhama nung September 25, 2021 nü Zao's Gym & Fitness Centre semzükba mapang tangokba noksa ka nung social activist Kezhokhoto Savi den pastor Johan Zao, iba Centre kibur Vikukhol Zao aser trainer Adolie Kire nungertem angur.

Dimapur, Rongjui/Sept. 26 (TYO): "Zao's Gym & Fitness Centre" nungja agütsür Jakhama Block nung mezüngbuba physical fitness centre ka St. Joseph's College Autonomous, Jakhama tsünglanglen Zhodi Colony, NH-29 nung September 25, 2021 nü semzüka liasü. Iba tesem ya Jakhama Christian Revival Church nung pastor Johan Zao-i sarasadema lapoktsü. Iba Centre nung temang anema alitsü asoshi inyaksangshi balala atema anepdang 5:00 ako nungi 7:30 ako tashi aser nikongdang 3:00 ako nungi 9:00 ako tashi lapoktsü. Anepdang tetsürtem asoshia mapang ka agütsütsü. Iba Centre indang kibur Vikukhol Zao ya Sports Management nung zünger ang Laxmibai National University of Physical Education, Gwalior, M.P nung certified basketball coach ka lir aser ano tang St. Joseph's College Autonomous, Jakhama nung tesayur inyaker. Iba Centre nung trainer aser in-charge, Adolie Kire ya Laxmibai National University of Physical Education, Gwalior, M.P nungi certified Management/Trainer ka lir. Iba sentong moaja jembida mapang social activist Kezhokhoto Savi-i 'Anema alibaji rongsen,' ta ashi. Temang atsüshia inyaksangshiba ajanga nisung ka temang tajungba kumdaktsütsü aser tashidak tamajung tentetba ajemdaktsür, ta pai ashi. Teti temang atsüshia inyaksangshiba ajanga temang nung teyari agütsüba kisung masü saka takum yimya tajungba kuma melenshidaktsür aser blood pressure ajemdaktsür, ta paisa ashi.

Kohima nung gari anena ayuba anepalutsü atema metetdaktsür

Dimapur, Rongjui/Sept. 26 (TYO): Tsünglanglen agüja aliba tesemtem nung gari anena ayuba ketdangtsütsü atema Kohima Smart City Limited aser Kohima Village Youth Organisation nem nungloktür, ta Deputy Commissioner aser Chairman RTA, Kohima, Gregory Thejawelie NCS ajanga sangdong ka nung ashi.

1. City Centre Parking Site.
2. Khuochiezhie Parking site.
3. Post Office Y junction nungi Congress Bhavan.
4. Management Authorities ajanga signage teperi agütsütsü aser nüburtem akumtsüba aser jeret-pereta mapa inyaktüsü. Iba totuyuba ya nüburtem ajanzüktsü mechi aser RTA aser tentet balala den September 3, 2021 anogo senden amendang jembida ama alitsü, ta sangdong ajanga ashi.

Arunachal nung tayimtsü senzütsü atema HAL-i Alliance Air den tenangzüktep agi



Itanagar, September 26, 2021 (Agencies): Deobarnü Hindustan Aeronautics Limited (HAL)-i Alliance Air Aviation Limited den Arunachal Pradesh nung tayimtsü senzütsü atema lease agreement ka nung sign sütepogo.

HAL-i iba asoshi Civil Do-228 tayimtsü ana agütsütsü.

"HAL-i Alliance Air Aviation Limited den lease agreement ung sign asüba ajanga India indang Regional Connectivity Scheme (RCS) jenjang tajungba kümogo. Arunachal Pradesh nung senzütsü atema Civil Do-228 tayimtsü ana

agütsütsü" ta HAL-i tanü metetdaksü.

Iba ya state atema tongtipang anogo ka lir aser connectivity tajungba akümtsü, ta Arunachal Pradesh chief minister Pema Khandu-ia ashi.

India nung yangluba Do-228 tayimtsü nung nisung 16 amener aser taküm asükwa mapang Arunachal nung meta talang pilar alidak tayimtsü senzütsü, ta Khandu-isa ashi.

CM Khandu-isa Union Civil Aviation Minister Jyotiraditya M Scindia, Secretary PS Kharola, Joint Secre-

tary Usha Padhee, HAL, Alliance Air aser Union DoNER Minister nung dang pelaba metetdaksü.

Iba sentong nung chief minister Khandu, deputy CM Chowna Mein, home minister Bamang Felix, MP Tapir Gao aser state chief secretary nungertem aden.

"Arunachal Pradesh nung HAL Do-228 tayimtsü amshitsü atema tanep Hindustan Aeronautics Ltd aser Alliance Air Aviation Ltd tsüngda Lease Agreement nung sign asüba sentong nung denogo" ta Chowna Mein-i metetdaksü.

Assam nung nisung ashioktsüba maparen ka makdok

Guwahati, September 26, 2021 (Agencies): Nagaon aser Guwahati police-i Honibarnü Guwahati nung Mridupawan Neog'er ki mita aodang Rs 30 lakhs alangba ozüng alema maparen ka makdokogo.

Police-i Neog'er kidang .32 pistol ka, live rounds 20, sen lakh aika alangba hon, foreign liquor aika, sorkar department balala

indang taila kulikatetem & stickers, media house indang logo aser Fortuner ka ngutetogo.

Police-i Neog indang bodyguard Rakesh Dixit aser driver Bahin Boron na apu saka pabo jena ogo.

Nagaon nung Imran Hussain ta ser nisung kati Neog anema ken o benok. Hussain-i gari alitsü atema Neog nem agütsü ta FIR

nung shia liasü aser iba nung ajemdaker police-i bushisüngdangtsü tenzük.

Neog-i pa sorkar ketdangsur ka ta shia nisungtem ashioktsü. Ajisüaka, police-i pa bushiba meteta pa jena ao.

2009 nunga Neog ya ozüng alema mozü shibelenba ken o ka nung shilem agia liasü aser pa anema FIR ka benoka liasü.

Brahmaputra nung kaketshir 4 arakset; Mang ka mangu bushiteper

Guwahati, September 26, 2021 (Agencies): Deobarnü Pandu Ghat kübok Brahmaputra ayong nung arakseta asür kaketshir pezü rongnung mang asem shi nikongdang ngutetogo.

Brahmaputra ayong nung araksetertemji Dayal Sheikh, Abinash Das, Jit Das aser Dip Sarkar nung ta jangjaogo.

Par pezü rongnung Brahmaputra ayong nungi ngutetba tasü mang asemji Dip Sarkar, Dayal Sheikh aser Jit Das ta jangjaogo.

State Disaster Response Force (SDRF) aser National Disaster Response Force (NDRF) teloktemi iba ayong nung parnok rongnung adener

nisung pezübuba (Abinash Das) bushidar.

Deobarnü kaketshir pezü ya tuition class temer sülen tzü awatsü aser chikotsü asoshi Brahmaputra ayongi ao aser Pandu Ghat anasa kaketshir pezüprongla samadok.

Pandu kübok SRP office anasa iba lendong ataloka liasü.

Iba tesem nungi kaketshir pezüprongla indang school bags aser tsüngsemtem nguteta liasü. Kaketshir pezüprongla indang osettsüsettem par tsüraburi jangjatetogo.

Deobar nikongdang 2:00 ako meta iba tesem nung alirtemi tzüküm anasa kaketshir pezüprongla indang schoolbags angu.

Manipur nung KNF telungpur pezü apu

Imphal, September 26, 2021 (Agencies): Manipur nung Security Forces-i Kuki nung telungpur pezü puogo. Telungpur pezüprongla ya Kuki National Front (Mangkholam Kipgen faction) nungi lir.

Manipur Police aser Assam Rifles longjemmer mita aoba mapang KNF telungpur pezüprongla apu. Parnoki

Kangpokpi district kübok Gopibung yimtsüng mita aoba mapang telungpur pezüprongla pua liasü.

Parnok apuba den külemi sepaitemi telungpurtem ket nungi 9mm pistol 3 aser cartridge 4 ngutetogo.

Pua alir KNF telungpur pezüprongla anema police station nung ken o ka benokogo.

Meghalaya nungi pur aoba tetsür ana Assam nung kümzük

Shillong, September 26, 2021 (Agencies): Meghalaya nungi tanur tetsür ana pur aoba Assam nungi kümzükogo.

Tanur ana ya Meghalaya kübok East Jaintia Hills district nungi lir. Cachar district kübok Kalain jila nungi tena kümzük.

Iba maparen dak sendakba nung nisung ana puogo. Assam police teyari agia Meghalaya police-i iba ken o dak sendakba nung bushisüngdangtsü tenzükogo.

Police-i apuba nisung anaji Saydul Islam aser Raju na ta jangjaogo.

Saydul aser Raju nati tanur tetsür ana den medemer ama mesüzüka jembi aser tena pua ayu ta police-i ashi.

Police-i kümzükba tetsür anaprongla East Jaintia Hills-i anir aruogo. Iba amala maparen dak sendakba nung inyakyimtem tembanger sülen tenaprong Child Welfare Committee (CWC) ket nung agütsüogo.

Kamrupia Dhuliya indang workshop tenzükogo

Guwahati, September 26, 2021 (Agencies): Nalbari kübok Khelua Hari Mandir nung Kamrupia Dhuliya indang anogo 10 workshop sentong tenzükogo.

Iba workshop ya Honibar nungi tenzükaga liasü aser Directorate of Cultural Affairs, Assam-i Union Ministry of Culture kübok Eastern Zonal Cultural Centre, Kolkata den yaritepa ayongzük.

Assam indang sobaliba tentet - CHHAYA-The Shadow, Nalbari ajanga iba workshop achaayanga agidar.

Assam indang sobaliba Kamrupia Dhuliya art kümzükaga ayutsü aser ajungkettsü nükjidong nung iba workshop agir.

Kamrup nungi Kamrupia Dhuliya ya asem atemba sobaliba inyakyim ka lir aser benjongbentsü, kiyimba sentong, Saivite mesüra Sakti cult indang tamangba benjong mapang shilem agirtemi Bor Dhul ta nungja agütsüba asem tululu atemer.

Bor Dhul atemba den külemi Kamrupia Dhuliyas nung jilushi balala meyoktepa aser acrobatic skill tem sayur. Asem atemba den külemi Kamrupia Dhuliyas nung ken tena tsüngsangba sayur.

Honibarnü, iba workshop lapokba sentong nung tongti tesemdang senior cultural activist Swarswati Barman-i shimo milen ka tsüklokja tenzüktsü.



Honibar aonung Dhubri Police-i nashi bena aliba gari ka apuba angur. Dhubri Police-i gari indang tyre nung injang khalokja anendaksü saka am mang nung driver jena ao. Iba gari nung nashi 6 bena liasü. (Dhubri, September 26)



TIR YIMYIM YIMOBILEM (EDITORIAL)

DIMAPUR TENTONÜ, RONGJUI (SEPTEMBER) 27, 2021

Asenok sübosülemtsü

Asenok Naga nunger akaba rongnung kanga takar ta züngshitsüsa akabaji kin aser kidong shia sübosülemtsü balala purapiteta yanglua agiba ya ka lir. Aser ano, asenok sobaliba tajungtem rongnunga asen pelaba sayua aser tangartema peladakja sempet agütsüba awashi yimya ya ka asütsü. Aji oda, tangar den jungtepnüba aser asen pelaba tamaisü sayutsüba asen akaba nungi agütsütsüsa adoker. Iba jagi, asen tsüraburtemi sensakertem asoshibo awashi yimya sayutsüsa makoker ta jembia aruba asenoki angashir. Tetezü, pelaba sayua mesüra peladaksünua langka agütsünüyonga makaba agi magütsüteter, anungji sensakertembo awashi memetet kanga shisanger. Aji oda, awashi metet yimya sayutsüba pei akaba nungiang agütsütsü asünungji, asenoka asenok rongnung sempetsüpet amshidang aser asenoki tangar nem sempet agütsüdang, aiben asenoki asenok kin kidong sü agütsür. Ano, tanü asüngbo asenok sobaliba kin kidong sü agi semoksü waist coat yanglur agütsüba yimya kanga bolua kümogo. Iba ama asena asen akaba nungi tajungtiba shimteta sempet agütsüba noksatem aiben asenoki osangkakettem nung adokba angur. Atangji, asenoki asenok sobaliba sübosülemtsü agütsüba jagi tetezü tajung keta agütsür, kechiyong sü shia nung aliba ayak aser noksatem shiagi tetezü keta lir. Ajisüaka, tagizükertem jagibo item tetezüji masü saka sü tour ajung majungji dang reprangtsü aser parnok nem agütsüba sempetji parnok meyong akümer asünungji, agizüker sülenbo parnok nungdak nung parnok amshinütsü amshitsüba jagi parnok temeten lir. Iba jagi, tanga sübosülemtsütem amshiba yimyatem khen yutsür, asenok Aor sübosülemtsü rongnung tajungtiba Tsüngkotepsü ya asenoki dang masü saka tangaria tangar nem sempet agütsüba asenoki angur. Tetezü, asen sü ya tangaria kanga sapua amshir. Aji junger, kechiyong aji asen konang. Ajisüaka, tezüdangtsüka aiben asenoki agütsüba nokinketer aser süchir sü to tetsüri abener senzür, ano karibo mashikoshi abener jajar, ano karibo table nung alemer, aser karibo kidang teindangba sü ama amshir. Ano, küm ishia jakdangbo asenok tsüngkotepsü noksa ya tayimtsü tashikang nung topur junga zülur anung nung yimzua liasü. Ajisüaka, itemji asenoki magizüketter, kechiyong tsüngkotepsüji yamaji mashimashi nung amshitsüba sü ka masü. Tanü putu nung item mapatem ya jungjunga shisadanga meinyakra asenok rongsenren nunga akoksatsü aser sobaliba ayaka samatsü. Joko, tsüngkotepsü ya asenok asoshia nokinketer aser süchir takar sü masü saka tebur sü ka dang kümogo, anungji tebur ajaki abentsü akoker. Ashi, akhi tsürabur mapang sobaliba apia tsüngkotepsü abendi asübo, tanüa asenok rongnung aikati iba sü ya mabentetsü. Aji oda, tanü putu yabo tangar yirutsüsa meinyakrabang aser lateta akaba ozüng anema meinyakra, pei sünütsü sütetba aser inyaknütsü inyakba putu ka lir. Iba jagiang arr aleper maleper kecha mali, sensaker takar kecha mali, tebur süra ojang, ajaki tsüngkotepsü abentsü akok. Iba dakji alema, tanübo asen sübosülemtsü ya yangluba, atakba aser ayokba agi kibong mesüa takar akümer aser aji shingai aji songtemsü makok. Aji oda, songtemtsü melen asen sobaliba sübosülemtsü ya alima ajaki sapua alitsü aser agitsüsa asenoki kanga junga aika adokdaksütsüsa textile industry tensa den apet lapoka sü atakertem aser ayokertem ajungshitsüba jagi government sentong nung alitsü nungdaker. Asenoki ayokba aser agütsüba sobaliba sübosülemtsü ya kodang koma abentsü aser sübötü aji talir aser tagizüker nem tanga osettem nung aliba ama "user manual" alitsü menügdaker, iba jagi magütsür aser agütsüyonga shibai alima ajaklen itemji repranga anepalutetsü, anungji asenoki ayokba aser agütsüba kiburtemi koma amshiner, aji parnok mulungba nung amshir. Aji oda, tanga sübosülemtsüjibo yutsür, asenokia US flag agi neptsübangtsü aidokba sü (handkerchief) aser telong sü tapu balala yanglua amshir. Iba atemaji US yimteni kecha mashir. Iba amaji, tanü putu nungbo, asenok sübosülemtsüa tangari mashika nung amshiyonga asenok temulung meyrutsüsa asenok dak tangtetba sademsadema alitsü nungdaker. Aji oda, tanübo pei sobaliba oset aser sübosülemtsü dang masü pei lima nung peii züsentetba chiyongtsütema dena alima nem kibur metetdaksütsü asoshi Geographical Indication System (GIS) nungang register asütsü nungdaker. Aji oda, India nung Ministry of Textiles-ibo Geographical Indication (GI) of Goods Act 1999 kükok pei kin aser kidong sübosülemtsü register asütsü asoshi teyaria agütsür. Asenok anasa alirtem meyong kin sü aser chiyongtsü Geographical Indication nung zuluoka alirtemji Assam nunger Muga sü, Arunachal nunger Idu Mishmi kin sü aser Darjeeling süngo-tem lir. Tawa Naga nunger Chakhesang nunger sü-a tapu ka GI nung züngokba asenoki angashiogo. Aji oda, tanü putu nungbo, sübosülemtsü ya kechi koma agitsü ta masü saka shir meyong, shirnoki kong yanglur ta metetsü aser jangjatsüba jagiang tongtibang kümogo.

OLEMSABANG

Arogo, Tenzükba Mapa Aser Temeshi Lai

~ Rev. Dr. A. Tali Ao, CTC

(Yashi adok nungi...)

b) Alima Yimden Yimli Yimya aser Inyakyim agi Arogo nung Tenzükba Mapa Amoksepba

Tenyartem sülen arogoji tebuteditem mesüra tamburtem, elders or presbyters, ketdang süba kükoki aru. Parnok dangji episcopoi, overseers, ta aja. Tebilem nung elders aser bishops ya kasa khuret abenba aser tenzükba asoshi amshi. T. Mapa 20:28 nung tamburtem episcopoi or overseers mapa inyaksü asoshi ashir. Ao nung 'sannükertem' ta amshia lir. Tenyar Peteri paji tangar tamburtem den saku ta züngshi (sumpresbuteros, 'külem tambur ka' 1 Pet 5:1). Pauli Tita dang arogo nung tamburtem, presbuteros shimtsü mela (Tit 1:5). Tanabuba aser tasembuba Yohan shiti zülur jagi paji tambur ka ta ajar, presbuteros (2 Jn 1; 3 Jn 1). Item yagi sayur Tasen Lai mapang tashi nung presbyter/elder aser episcopos or bishop kasa jenjang nung liasü.

Iba sülen küm noklang anabuba nungang arogo nung tenzükba mapa nung monarchical episcopate, i.e., the rule of one bishop, adok. Iba nungi tenzükba episcopos aser elders na tetsüngda tepila jangja jangja lemdang. Antioch nung Bishop Ignatius-i (c. 50-110) bishop kati dang arogo nung tashi aser tenzükba mapa inyakyim indang zülusema angur.

Arogo nung monarchical bishop ka jagi tangar tamburtem, elders, aser deacons madak tashi amshi. Yamaji arogo tenzükba menden ana, two-tiered ministry, i.e., presbyter/bishop and deacon nungi menden asem tentet, the three-tiered ministry, i.e., bishop, presbyter and deacon.

Arogo nung tekolak ka nem dang, i.e., one bishop aser Pope, tashi aser yimli ajak agütsüba inyakyim koda tentet ajak jembitsü mapang mali. Saka koda Yisui kilir tatishitsü nung tenzükba mapa tenteta doktsüba nungi aser arogo nung züngsem ajak saku 'radical democratic assembly of equals of all believers' nungi pilaba aser tenzükba mapa nung nisung ishikati dang tashi aser yimli amshiba ajanga arogo tenzükba mapa nung kechi teraksa bener aru iba indang onük kar shisemdi.

- i) Iba ya ajanga arogo nung tenzükba mapa nung tenzükba ka dang temaba aser tongtipangba tarensen bener aru. The transformation of the ministerial structure into a predominantly hierarchical structure with higher and lower positions as on a ladder. Iba ama inyakyim nung nütsüng nüburttem, tetsürtem, tilartem, aenertem, sensakertem, kilirtem, aser alartem takidak maka kumdaktsü.
- ii) Ka dang temaba aser tongti tatongsen jagi arogo nung Yisu Khristai sayuba tatishitsü kilir ama tenzükba mapa samadaktsü.
- iii) Arogo nung kilir ama tenzükba jagi teti asoshi konang ka ama masü saka khen atema dang; nai khen tila kümra na yakta temaba jenjangi atutsü ta sayu. The diaconate as the essential character of church ministry was reduced to a mere stepping stone in the ascent of a minister to the higher dignity in the hierarchy.
- iv) Küm noklang asemububa nungbo arogo nung menden asem the three-tiered ministry, i.e., bishop, presbyter and deacon, tetsüngda tepila kanga sashia aküm. Anungji putir aser nüburt tsüngda tepila tulu aküm. Iba tensa nung arogo tenzükertem shirnok tongti tatongsen menden nung züngsem parnok dang sacredos, 'priest' ta ajatsü tenzük.
- v) Kodang arogo nung tenzükba jagi tongti tatongsenren ka amai aküm, kilir ama tila kümer tanger kükoki ia ajemalua tenzükba jagi mezüngmeshi mapa ka ama bilem aser ajaki tuluba aser temaba jenjang atongtsü dang raktep.
- vi) Oda oda makamaitertem aser tepetzük tia nung alirtem arogo tenzükba menden nung anioktsüji doktsür parnok yaritsü aser par khuret arogoi abentsü anenadok.
- vii) Oda oda deacon, tenzükba mapa, i.e., the diaconate as a permanent form of ministry became superfluous in the ministerial structure of the church. Tangbo arogoji mapa, job, employment, white colour job angudak ang kuma odar. Asenok tendak aiben deaconji kilir masü kibur ama akümer.

c) Arogo Tenzükba Mapa aser Ainker Ola

Arogoji Tsüngremi Khrista Yisu nung jatetba purtem lir. Anungji arogo tenzükba mapa nung alimai ashiba aser aniba ama masü saka Tsüngremi ashiba angatsü tongtibangba lir. Arogoi Tsüngremi ashiba angatsüba dang masü saka Tsüngremi alima dang kechi ashir ibaji ochishia aser jangja jangja ayimoktsütsüla. Arogo ola ainkar ola ama yoktsü asoshi mezüngbuba nung arogo nung ochimashi ajak samadaktsütsüla. Iba nung Sannükertem/toklang tenzükertem aser Khrista nem bendanga agütsüba nütsüng nüburttem ajak tamang aser sarasadem agi nangri khanger Tsüngremer raraba sobutsü ajak sobutsüla (Eph 6:11). Tajemrepa nüburttem aser tepetzüktipa tia nung alirtem dangi aotsüla aser Khrista nung Tsüngrem osang tajung ashiba den külemi parnok ola angaa kechi ochi mashiba aser tim masüba agi temenen talenba nung asenok alir item anema parnok den külemi tamang agi raratsüla.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

Kenya nung Arogotemi yimten lenirtem nem sabang magütsütsü

September 26, 2021: Sangküm küm tetenzüklen Kenya nung general election agitsü lia Kenya nung Anglican, Presbyterian, Roman Catholic aser evangelical Arogotemi Tenla kidang yimtenren lenirtem nem sabang mamshidaksütsü lemtetogo.

Ajisüaka Methodist Arogotemibo Tenla kidang yimtenren lenirtem nem sabang amshidaksütsü.

Kenya nung Medhodist Arogo nung Tir, Joseph Ntombura-i, Tenla kidang yimtenren lenirtem nem sabang magütsüra ibaji Arogo nung züngsemtem bendanga züngshiba den kasa asütsü, anungji onokibo ajak nem sabang amshidaksütsü, ta metetdaksü.

Osangbener den jembidang Joseph-i, "Tenla ki ya ajak asoshi lir aser meimchirtemji yimtenren den sendaktepa lir, anungji Tenla kidang yimtenren lenirtem nem sabang amshidaksütsü nungji kecha tai mali," ta metetdaksü.

Pai ashiba agi, Arogo nung züngsemtemi yimtenren lenirtem tebilemba onüktemji angadangsü nüngdak. Joseph Ntombura-isa, taoba mapangtem nunga Arogoi mongintem jaoka tongti onük balala nung jembidaksü, yamaji yimtenren lenirtem nema sabang agütsüba nungji kecha tai mali,

ta metetdaksü. Kenya nung nütsüng shilem 85 bo Khristantem lir aser iba nungjagi shilem 33 Protestant Khristan aser shilem 21 Catholic Khristantem lir. Tanüngba Khristantemji evangelical, Pentecostal aser African denominations balala nungi lir.

Linük nung nütsüng shilem 11 shi dang Muslim nungertem lir.

Tenla kidang yimtenren lenirtem nem sabang magütsütsü atema lemtetba dak sendakba nung Arogotemi ashiba agi, tekülem sentong agiba mapang nung yimtenren lenirtem nem sabang agütsüra ibaji election nüboyim sentong ka ama akümtsü; ibaji dang masü saka candidate temi vote angutsü mechi nung tesempa o jembitsü.

Taküm July ita nung Kenya nung Presbyterian Arogoi mezüng Tenla kidang yimtenren lenirtem nem sabang mamshidaksütsü lemteta liasü aser tangbo Arogo aikati iba telemtetba agiogo.

Presbyterian Arogo nung lenir kati, "Tenla kidangi arutsü atema ajak pela jaoker ajisüaka Tenla kidang sabang aser lokti amenba tesem balala lir. Sabang ya putirtem atema aser lokti amenba tesemji tekülem kidangi arurtem atema," ta metetdakja liasü.

September 15 nü Roman Catholic Arogo nung putirtemia,

tekülem kitemji kanga temeshi, iba ya yimtenren atema sabang ka masü, ta metetdakja liasü.

September 17 nü Evangelical Alliance of Kenya (EAK)-ia yimtenren lenirtem nem Tenla kidang sabang mamshidaksütsü, ta sangdonga liasü.

EAK chairman David Oginde aser secretary general Nelson Makanda nati sangdong ka ajanga, "Tenla kidang politics asayatsü atema yimtenren lenirtem nem temelaba magütsütsü. Iba ya Tsüngrem akhüm metsübuba, tekülem raksatsüba aser tamangertem temeden anema inyakba mapa ka lir," ta metetdaksü.

"Yimtenren lenirtemi agütsüba tenlaji Laishiba nung shia aliba ama tenla ka dang südaktsütsüla. Teka tajichileni agütsüba nung tabelen nem memetdaksütsüla," ta EAK lenirtemi ashi.

Taoba mapangtem nung Kenya nung election mapang nung rara tulu adoka liasü. Talisa

December 2007 aser January 2008 nung rara ajanga nisung 1,000 shi asü aser nisung 600,000 dak tema jenshia liasü.

Supreme Council of Kenya Muslims Chairman, Sheikh Hassan Ole Naado-i, "Khristan lenirtemi agiba telemtetbaji ni pusemer. Iba ya temalen nungi nokdangtsüba liasü," ta ashi.

Yimsü meyipdaksür tongtiji Khristantem lir: Vellappally Natesan

Thiruvananthapuram (Kerala), September 26 (Agencies): Hindu Ezhava lenir aser Sree Narayana Dharma Paripalana Yogam general secretary, Vellappally Natesan-i, India nung tamangba yimsü meyipdaksür tongtiji Muslim nung masü saka Khristantem lir, ta metetdaksü.

Natesan ya NDA teloktep-Bharat Dharma Jana Sena nung lenir ka lir.


Tawa Catholic putir kati,

Hindu Ezhava nungi züngsemtemi Khristan tsürtem mesüzüker, ta tai tongloksüba dak sendakba nung Natesan-iba o ya jembia liasü.

"Kodang Khristan tsür ka Muslim nung den kibong küümdir tanga yimsü amanger tetsür noklang aika Khristantem den kibong akümer. Kechiba iba atemajibo shingaija mejembir. Khristantem Hindu Ezhava tsürtem den kibong akümer. Linük nung tamangba yimsü

meyipdaksür tongtiji Khristantem lir," ta Natesan-ashi.

"Muslim nung nungeri yimsü meyipdaksüba nung kangabo shilem magir. 'Love jihad' nung Khristan tsür ka dang Muslim nung loktiliba nung anioker. Ajisüaka tamangba yimsü meyipdaksüba tsütsüba kibong rangben Khristan akümer. Tamangba yimsü meyipdaksüba aser 'love jihad' tsütsü tongtiji Khristantem lir," ta pai ashi.



Scientist temi Jordan kubok Iell el-Hammam nung ngutetba noksa nung angur. Scientist temi küm 3,600 tejaklen anüng nungi 'meteor' ka jaksaba sülen alima nung tsükba kull ngutetogo, aser ibaji Laishiba nung shia aliba Sodom aser Gomorrah yimti asütsü akok, ta parnoki bilemer.

ANOGO ABEN TSÜNGREM DEN

TEMELENSHI ADOKDAKTSÜSANG

Tsüngremi ashi anüngdang nungi aonung lemdangtsü asoshi anüng nung tesangwatem lidakang aser itemji temaitsü asoshi, mapang, anogotem aser kümtem aser tsüngküm mongpu asoshi süang. Lipok 1:14.

Tsüngrem mulungjang nungi shisatsü tajung adokba rongnung jangratemtsü kaji, alima nung Pai kechisa yanglu item ajakji melenshia melentepa aliba ajanga teyangluba ajak atema tajangzük aser terenlok nung lia aotsü asoshi lir; kechiaser mapang, anogotem, kümtem aser tsüngküm mongpu ajak pei mapang shitak nung melentepba ajanga talisa meimchir nungi tenzüka taküm arakzua aliba ajak atema iba temelenshi tashi nungji taküm liyonga aor.

Tsüngrem shiba dak tematiba temelenshi agütsütsü tashi lir, iba dakji tanüla tangatetba tashi nung amanga aser azüita alitsüji nisunger teinyaktsü lir.

Anungji iba nungjagi aseni temulungjang ajunga nungi Tsüngrem tashi ajanga dang kechisarina alima nung taküm ajak dangi temelenshi ajanga tabensabaji bener arutsüba indangji mamatoki benshitetra anogoshi aseni ajurubatem temelenshiji asen atema temoatsü asütsü.

Sarasadem

Oh Tsüngrem ozü alima meimchir asoshi mapang ajak nung temelenshi tia jenjang tajung yanglutsü nung Ne tenüng asanger. Amen.

Sharia ozüng kübok Afghan Khristantem kanga reshikangshitsü

Washington D.C, ajemdaker onoki ozüng

September 26 (Agencies): Taliban interim sorkar nung züngsem aser Sharia ozüng benoker tongti, Mullah Nooruddin Turabi-i, Afghanistan nung Taliban yimsüsüba kübok ozüng alema inyakertem tepseta indoktsü aser temerenshi tulu agütsütsü ta sangdongogo, ta International Christian Concern (ICC)-i metetdaksü.

Iba sangdong ajanga Afghan nung Khristantem tsübuteper; Khristantem Taliban teloki parnok ya ozüng alema inyakertem ama züngshitsü akok, ta tsübua bilemer, kechiyong parnok aika Islam yimsü toktsür Khristan yimsü agizükertem lir.

Interview ka nung jembidang Turabi-i, 1990s mapang nung Taliban yimsüsüba ajanga alima linüktem kanga jashi ta asübaji tai, ta metetdaksü.

Tamalen Taliban yimsüsüba mapang nung Turabi ya Justice Minister aser Ministry for Propagation of Virtue & Prevention of Vice tongti liasü aser pa kübok nisung aika tetsüng teben alangdokja liasü.

"Stadium nung temerenshi agütsüba atema nisung ajaki onok aija liasü, ajisüaka onoki parnok ozüngtem aser temerenshitem kodanga maitsür, anungji onok ozüngtemji shingaija maitsütsüla, Onoki Islam yimsü benshir aser Quran nung

ajemdaker onoki ozüng yanglur," ta Turabi-i ashi. "Security atema teka alangdoktsütsüji nüngdak. Ibaji ajanga ozüng alema inyaktsüpurtem nokdang. Sorkar tasenbai yimjak nung temerenshi agütsütsü asü magütsütsü ta shisadangdar," ta Turabi-isa metetdaksü.

August 15 nü Taliban teloki Afghanistan yimtiba, Kabul agiba sülen September 7 nü interim sorkar tenteta liasü.

Taliban teloki Sharia ozüng kübok Afghan nung Khristantem kanga reshikangshitsü akok, ta Khristantem tsübuteper.

Taliban-i Sharia ozüng ratetba rongnung- Afghan Khristantemji yimsü mezüngmeshirtem ama züngshitsü, kechiyong parnoki Islam yimsü toktsür Khristan yimsü agizük, anungji parnok nem temerenshi tulu agütsütsü akok.

ICC Regional Manager for South Asia, William Stark-i, "Taliban yimsüsüba kübok Afghan nung Khristantem atema International Christian Concern-i kanga shisabulua bilemetsür. Interim sorkar tentetba sülen nungi Taliban-i Afghanistan koma yimsüsütsü, ta lemsatetpa arudar. Afghan Khristantem aser minorities kanga reshikangshitsü akok. Talisa Islam yimsü toktsür Afghan Khristantem kanga reshikangshitsü. Parnok kümzüksü atema alima linüktemi inyaktsüla," ta metetdaksü.

Modi-i US semdangba sülen Delhi tonga aruogo



September 26, 2021 nü Ato kilonser, Narendra Modi US nungi meyipa aruba sülen AFS Palam, New Delhi nung ketdangsertemi pa agizükba mapang tangokba noksa nung angur.

New Delhi, Rongjui/September 26 (Agencies): Ato kilonser, Narendra Modi-i anogo asemnü US semdangba sülen Amongnü New Delhi tonga aruogo; US nung Narendra Modi-i United Nations General Assembly (UNGA) nung jembia liasü aser Quadrilateral Security Dialogue (Quad) Summit nung shilem agia aden.

Amongnü Bharatiya Janata Party (BJP) Tir, JP Nadda den

party general secretaries Arun Singh aser Tarun Chugh na, taoba mapang health minister Harsh Vardhan, Delhi BJP Tir, Adesh Gupta aser party nung tongti lenirtemi airport nung Modi agizük.

US semdangba mapang nung Modi-i US Tir, Joe Biden den senden amen. Taküm January 20 nü Joe Biden-i Tir tenangzükba agiba sülen tang mezüng Modi-i pa den senden menogo.

Ato kilonser, Modi-isa US

tatong Tir, Kamala Harris aser America nunger company balala nungi CEOs den senden menogo.

Quad senden jakdang Modi-i Australia Ato kilonser, Scott Morrison aser Japan Ato kilonser, Yoshihide Suga na den-a senden menogo.

Modi-i 76buba United Nations General Assembly nunga jembia. Coronavirus wara prokba sülen tang mezüng Ato kilonseri US semdangogo.

Congress-i aluyimertemi ayongzükba 'Bharat Bandh' nung shilem agitsü

New Delhi, September 26 (Agencies): India nung aluyimertem unions-i aluyimba dak sendakba ozüing tasen asem anema September 27 nü Bharat Bandh ayongzükogo, ibaji pusema Congress-i party nung inyakertem, state balala nung party Tirtem aser frontal organizations dang 'Bharat Bandh' nung shilem agitsü metetdaksüogo.

Aluyimertem unions 40 dak temai akümba tentet-Samyukta Kisan Morcha-ia nüburtem dang parnoki ayongzükba Bharat Bandh nung shilem agidaksüner, ta sangdongogo.

Congress general secretary (organization), K C Venugopal-i, Congress aser party nung inyakertemi akokba tashi 'Bharat Bandh' nungitsü, ta metetdaksü.

"Aluyimertem temeden atema onoki nokdaker aser aluyimba ozüing tanak asem anema parnoki raraba nung onoki pusemsü," ta pai twitter ajanga metetdaksü.

Paisa, "PCC Tirtem aser Frontal Organizations nung

tongti lenirtem dang linük tesem ajungalen aluyimertemi ayongzükba Bharat Bandh nung shilem agitsü metetdaksüogo," ta ashi.

Aluyimba ozüing tasen asem dak sendakba nung Centre sorkar aser aluyimertem unions tsüingda senden 11 ben menogo saka telemetba kecha magiteta liasü.

Sorkar aser aluyimertem tsüingda tesüsabuba senden January 22 nü amen aser January 26 nü (Republic Day) aluyimertemi New Delhi nung tractor rally agidang rara tulu adokba sülenbo sorkar aser aluyimertem senden khen-a mamen.

Yaküm September ita nung Parliament nung Farmers' Produce Trade & Commerce (Promotion and Facilitation) Act, 2020, Farmers (Empowerment and Protection) Agreement of Price Assurance and Farm Services Act, 2020 aser Essential Commodities (Amendment) Act 2020 agizüka liasü aser November ita tatemlen nungi tenzükba aluyimertem Delhi arrtsülen adenshia ozüing tasen asem anema tang tashi longkak aita arur.

Amit Shah-i Maoists-i kongshiba state tem nung tensa asadang

New Delhi, September 26 (Agencies): Amongnü Union Home Minister, Amit Shah-i Maoists telungpurtemi timtem agütsüba state 10 nungi Chief minister trok aser tongti ketdangser pezü den senden mena security tensa aser terenlok projects asadangogo.

Iba senden nung adener chief minister temji Naveen Patnaik (Odisha), K Chandrashekar Rao (Telangana), Nitish Kumar (Bihar), Shivraj Singh Chouhan (Madhya Pradesh), Uddhav Thackeray (Maharashtra) aser Hemant Soren (Jharkhand) nunger liasü.

Senden nung adentsü atema West Bengal, Chhattisgarh, Andhra Pradesh aser Kerala state tem nungi chief minister tema jaok, ajisüaka state pezü nungjagi minister mesüra tongti ketdangsertem ang aden.

Senden nung Amit Shah-i

item states nung security tensa aser Maoists telungpurtem anema operation aoba asadangba den külemi terenlok projects asadang.

Shah-isa item states nung telungpurtem anema raratsü atema sepaitem nungdakba asadangba den gari lenmang, apu, school aser health centres tasen amenokba projects asadang.

Senden nung jembidang Odisha chief minister, Naveen Patnaik-i, tangbo state nung Maoists-i timtem agütsüba district asem dang kümogo, ta metetdaksü.

Kasa senden nungji Union ministers- Ashwini Vaishnav, Giriraj Singh, Arjun Munda aser Nityanada Rai nunger den Union home secretary Ajay Bhalla, director of intelligence bureau Arvinda Kumar aser Central aser states nungi police tongti ketdangsertem aden. Union home ministry data

ajanga ashiba agi, linük nung Maoists-i timtem agütsüba districts kanga ajema kümogo aser tangbo district 45 shi nung ang parnoki timtem agütsür.

Ajisüaka linük nung Maoists-i timtem agütsüba district 90 lir ta züingshia Security Related Expenditure (SRE) Scheme nungi teyari agütsür.

2019 küm India nung Maoists- Left Wing Extremism (LWE)-i timtem agütsüba district 61 liasü aser 2020 küm district 45 dang liasü.

2015 küm nungi tenzükba 2020 küm tashi nung Maoists-i timtem agütsüba tesemtem nung rara balala nung security sepai 380, civilian 1000 dak tema aser Maoists telungpur 900 shi süogo.

2015 nungi 2020 küm tashi nung Maoists telungpur 4,200-i 'surrender' süogo, ta Union Home Ministry osang ajanga metetdaksü.



September 26, 2021 nü Karnal nung Haryana Chief Minister, Manohar Lal-i Pulse Polio campaign tenzükja tanur ka nem polio jemdaksüba noksa nung angur.

Global Peace senden nung adentsü atema Mamata nem temelaba magütsü

Kolkata, September 26 (Agencies): West Bengal Chief Minister, Mamata Banerjee-i, Italy kübok Rome nung Global Peace Conference nung adentsü atema Centre sorkari la nem temelaba magütsü, ta metetdaksü.

Bhabanipur nung election senden ka nung jembidang Trinamool Congress tongti, Mamata-i, tenük meremba agi iba conference nung adentsü atema Centre-i la nem temelaba magütsü, kechiyong India nungi la dang jaok, ta metetdaksü.

October ita mezüingbuba hopta nung Rome nung ayongzükba International Conference nung adentsü atema alima nung tamangba yimsü balala nungi lenirtem aser nüingtu nung aika jaokogo; iba senden nung adentsü atema India nungibo Mamata dang

jaok.

Iba senden nungji India nunger ka dang jaok aser Hindu tsürtem rongnung la dang iba conference nungji adentsü liasü, saka Centre-i memela, ta lai metetdaksü.

"Ajisüaka tenük meremba agi BJP-i memela, koba ajanga alima sabang nung India nunger akhümket makai akümer," ta lai ashi.

Laisa Assam nung police-i injang yokba ajanga longkak aiter ana kasetba atema BJP sorkar aitsü.

"Ki bendoktsüba nung ajemdaker Assam nung meimchirtem reshikangshir. Injang yoka tai maket nisungtem azü tokshio saka NHRC team-i iba state ji mesemdang. NHRC team-i khenkhen dang Bengal-a semdang. Iba ya maaksütsüka lir," ta lai ashi.



Bengaluru, September 26, 2021: India nung gari totzü aser LPG jenjang kanga atuba anema Amongnü Bengaluru nung Karnataka Pradesh Youth Congress züingsemtemi cycle nung mener longkak aitba noksa nung angur.

Taliban-i Afghan passports, national identity melentsü

Kabul, Rongjui/September 26 (Agencies): Taliban-i sangdong ka ajanga, taoba sorkari agütsüba Afghan passports aser national identity card tem parnoki melentsütsü ta sangdongba den tanga atemabo card tejenba amshia atatetsü, ta local media sangdong ka ajanga metetdaksü.

Khaama Press News Agency sangdong ka ajanga, Taliban deputy minister of information & culture otongdar Zabiullah Mujahid-i, Afghan passports aser NID tem nungja "Islamic Emirate of Afghanistan"-i melentsü akok, ta ashiba metetdaksü. Mujahid-isa, taoba sorkari agütsüba kuli kakettek amshia atatetsü, ta ashi.

News agency sangdong ajangsa, Afghanistan nung passport aser national identity

card department tem tang tashi melapoki lir aser biometrics agir alirtemi dang item kuli kakettek agizük amshitetsü, ta ashi.

Taliban-i taoba ita linük atsüngba sülen temelenshi aika bener arudar aser parnoki women's ministry dena "Ministries of Prayer and Guidance and the Promotion of Virtue and Prevention of Vice" agi melentsüogo, iba den tetsürtem school-i aotsü memelar aser ozüng raksartem nem tasüba agi temerenshi agütsüba amala ozüngtem benoka inyaksangshhi tenzükogo.

Honibarnü Herat yimti nung local sorkar ketdangser kati ashiba agi, Taliban-i nisung pur aoer pezü tepseter parnok tasümgang yimjak nung sendaka toktsü.

Heart yimti indang deputy

governor Sher Ahmad Ammari, item nisungtem yagi shishilembar ka aser par jabaso pua bener ao aser sepaimeitkar temi parnok anguba sülen nisung ana ya yimti adena anir onüa liasü. Nisung pur aoertem aser sepaitem tsüngda khatepba sülen nisung pezüprongla tepset aser Taliban sepaimeitkar ya yirua liasü. "Parnok tasümgang yimti teyongi bener aru aser nisung pua bener aortem dang tatishtitsüka sayutsü atema sendaka toktsü," ta pai ashi.

Associated Press den iba hopta sensaksema mapang Taliban lenir tejen Mullah Nooruddin Turabi-i ashiba agi, parnoki ozüng raksartem tetsümgang teben alangdokja merenshiba aser tasüba agi merenshiba amala temerenshittem maneni benoktsü.

Germany nung Angela Merkel melentsü election agir



Berlin, Rongjui/Sept. 26 (Agencies): German nungertemi nungtugu aser mapang talangka nungi inyaka arula chancellor Angela Merkel melentsü atema parliamentary elections nung shilem agir.

Berlin yimtongtem nung küm shia agiba marathon ayongzüka agir, saka tetoktepba tulutibaji linük tesem ajungalen ayongzüka lir.

Vote agütsür atsür arutsü mechi chancellor menden yutsütsü alilai conservative candidate Armin Laschet den par ki alidak Aachen nung Honibarnü rally ka nung shilem agia liasü.

Europe nung rongsenketzümgang tashi tulutiba linük, Germany nung arishi küm 18 nungi tema vote agütsütsü temsüa alir nisung million 60 dak tema lir.

Vote agütsüba maparen ya Deobarnep 8:00 ako (par mapang) nung tenzük aser nikongdang 6:00 ako nung tembangba mapang takoker tejangja metettsü imlar.

Merkel-i election nung metokteptsü sangdongba sülen

takok angutsüpur metakzüteter aser la German yimten yimsüsüba nung temaba menden nung amenba hopta ishika tsüngta tembangtsü.

Vote agütsütsü ghonda 48 lia lai vote agütsür dang, "Lenir tajung shimtsü kanga tongtipang," ta nenshia ashi. Germany tashi ita alitsü nungdaker aser lanurtemi tarutsü jenjang tajung aginer, aser itemji Armin Laschet-i agütsütetsü, ta lai ashi.

Iba election kechi jenjang ka nung tembangtsüar mejangja. Vote agütsür shilem asem dak tema tang tashi shir nem vote agütsütsüar mejangja, saka otsü tasen yanglua post ajanga vote agütsüogo.

Tir Frank-Walter Steinmeier-i German nung ajunga dang vote agütsütsü ajungshia jembiba mapang, "Shibai shilem agidir angashitsü, shibai shilem magilir parnok atema dangari telemtetba agitsü," ta ashi.

Ita aika opinion polls nung takok angur tejangja monguteti aru. Mezümgangbo conservative CDU aser par Bavarian sister

party ajanga takok angutsü ama sayu aser mapang ka Greens temaba jenjang nung liasü, saka Olaf Scholz kübok Social Democrats jenjang tajungba akum.

Chancellor menden asoshi toktepba candidate asem rongnung Scholz den vote timba lir. Pa ya Merkel indang deputy ka lir aser pai takok angutsü jenjang tajungba amai ajiteter.

Saka pai takok nguaka teloktep sorkar ka tentettsü atema pai danga party ana teyari nungdaksü.

"Ni atema tongtipangtiba teloktep ji vote agütsürtem den lir, kechiaser parnoki SPD tashi tuluba kumdaksüba ama ni sorkar ka tentettsü temelaba akumtsü," ta pai ashi.

Greens atema ibai mapang tajungtiba lir. German nung asoshi tzü-mopung melenshiba ya tebilemstü tulutiba lir.

Ajisüaka tematiba menden asoshi par telok nungi toktepsang Annalena Baerbock busemer ajema akumer.

Berlin kübok Alexanderplatz nung Honibarnü tapi agi asüngdangba mapang, danga party temia tzü-mopung melenba atema yabo inyaktetsü ama amanger.

Conservative Armin Laschet-i tekeratiba nung renewable energy dangi meyiptsü mapang tongogo, ta Honibarnü ashi.

Liberal FDP yagi onük aika nung Greens den meputeptsü akok, saka tzü-mopung melenshiba onük nung parnoki lanur aika atsür arur. Telok anaprong ya sorkar nung alitsü teimla lir.

Israel sepaitemi occupied West Bank nung Palestine nunger pezü tepset

Ramallah, Rongjui/Sept. 26 (Agencies): Israel mitkartemi aonung tepiyong tesem kar mita amakba mapang Palestine nunger pezü tepset aser occupied West Bank kübok Jenin aser Jerusalem tesemtem nung Deobarnü khatepa liasü.

Palestine health ministry indang odongtar Mohammad Hleil-i osangbener dang ashiba agi, northwest Jerusalem kübok Biddu yimtsümgang nung Palestine nunger nisung asem tepsetba ya Ahmad Zahran, Mahmoud Hmaidan aser Zakariya Badwan ta parnok kinungertemi jangjatetogo.

Israel sepaitemi Jenin yimti southwest tsütsü Burqin yimtsümgang nung alira ka tepset aser pa ya arishi küm 22 tain Osama Soboh ta jangjatetogo, ta Hleil-i ashi.

Ano Palestine nunger ka tepsetba osang lir, saka iba indang osang tejangja ano mangu, ta paisa ashi.

Yangji khatepba mapang Israel sepaimeitkar ana kanga mejungi yirua mozü kidang anepaluba mapang lir, ta Israel media ajanga ashir.

Hleil-i osangbener dang ashiba agi, Biddu nungi Palestine nunger asem tepsetba tasümgang ya Israel mitkar kabu nung lir. Pezübuba, Osama Soboh ya Jenin nung aliba Ibn Sina hospital nung asü.

Palestine nunger news agency Wafa ajanga ashiba agi, Israel sepaitemi Burqin mita aoba sülen ki ka lungbanga mitkartem den khatepba mapang Soboh ya khaset.

Zahran, Hmeidana aser Badwan nunger ya Biddu anasa Beit Anan jila nung Israel army den khatepba

mapang khaset.

" Hamas operatives " aputsü nükjidong nung mitkartemi item tesemtem ya mita ao, ta Israel media ajanga ashir.

Zahran'er kinungertemi ashiba agi, Israel sepaitemi pa ya hopta aika arishia arur aser taoba mapanga par ki mita bushia kinungertem pua asüngdangya asü.

Palestinian Authority temi Israel mitkartem yaria nisung pudaktsü aser taoba mapanga PA sepaitemi par ki mita bushia liasü, ta Ahmad Zahran tetsü ashi. "PA temi onok dangi Israel nunger ya yok," ta lai yangji aliba osangbener dang ashi.

PA Prime Minister Mohammad Shtayyeh-i sangdong ka nung Palestine nunger pezü asüba mang yima liasü.

"Asürtem kinunger adianutem nem taremzüka aser anisümgang agüjangma aser asen nübur nem iba ama mapa tamajung amshia amokbangba aser maneni azüdokshiba nungi nüji agüjangma," ta sangdong ajanga ashi.

Ramallah anasa Birzeit nung aliba Palestinian Museum ajanga sangdong ka nung Zakariya Badwan ya iba museum nung inyaker liasü, ta ashi.

West Bank kübok jila aser yimtsümgang nung Israel mitkartemi operation agiba ya anogoshi amai ajurur saka ita ishika Jenin tesem nung mita bushiba mapang Palestine nunger yangji alirtemi injang khaloktsür.

Taoba ita Jenin refugee camp nung Israel army temi operation ka agidang Palestine nunger pezü khaset aser iba sülen kanga sashia khatepa liasü.

Mujahideen indang jembiba atema Pakistan PM Imran Khan aitsü

Islamabad, Rongjui/September 26 (Agencies): United Nations General Assembly nung ojembiba dak ajemdaker Pakistan Ato Kilonser Imran Khan kanga mejungi aitsü tenzükogo.

UNGA forum nung Khan-i, 'mujahideen' ya 'heroes' ama zümgangshia aser taoba US tir Ronald Reagan-i parnok White House-i jaok, ta ashi.

"Osang ajanga ashiba agi, pai (Reagan) parnok (mujahideens) ya United States ngutetertem den medemdanga liasü. Parnok heroes tem liasü," ta Khan-i ashi.

PM Khan-i iba o jembizüka yokba sülen pa kanga mejungi aitsüdar. Pakistan nunger osangbener Gharidah Farooqi-i ashiba agi, pai osang taila ka nungi o agizüka jembiba ajanga alima matsümgang linük mak süogo. Laisa, pa atema onük zülutsür mapa nungi agintsüla ashi.

Khan aitsürtem rongnung Pakistan Opposition lenir Maryam Nawaz Sharif densema

liasü, shiba onük zülutsür masü saka Imran Khan mapa nungi agintsüla ta ashi.

Kasa mapang nung academician aser taoba mapang Afghan diplomat Mahmoud Saikal-i, Khan tamendakdak tashi mait liasü aser kuli timbaka tai liasü, ta ashi.

Maneni Pakistan nunger osangbener Naila Inayat-i, Ronald Reagan-i mujahideen White House-i jaok ta asüba o ya Imran Khan-i tang mezümgangba jembir masü, ta ashi. Laisa Twitter ajanga, 2019 küm New York nung Council on Foreign Relations sentong nung pai iba olen benoka liasü, ta ashi.

2019 küm September 23 nü New York nung Council on Foreign Relations (CFR) sentong nung o jembiba mapang Imran Khan-i, taoba US tir Ronald Reagan-i Soviet sepaitem den raraba Afghan mujahideen ya United States ngutetertem den medemdanga jembiba, ta ashi.

Entrepreneurs Guild, Dimapur ajanga BAN tir ajuru



Dimapur, Rongjui/Sept. 26 (TYO): Entrepreneurs Guild (EG), Dimapur nung executive

nung pa tir shimba atema tenüngsang agüja liasü.

Naga nung shishilepartem atema Business Association of Nagas ajanga mera balala agia mapa tajung jenti inyakba atema Entrepreneurs Guild ajanga pelaba lemsatepa liasü.

Maneni Entrepreneurs Guild züngsemtemi local entrepreneurs jenjang ajungkettsü atema BAN ajanga mapare balala inyakba ajunga nung nungita yariteptsü shia liasü.

Security Forces-i Langnok nung medical camp ayongzük

Noklak, Rongjui/September 26, 2021 (TYO): Deobarnü, HQ IGAR (North) kübok Assam Rifles indang Shamatore Battalion-i Langnok yimtsüng, Noklak District nung medical camp den külemi Scrub Typhus awareness lecture sentong ayongzüka liasü, ta sangdong ajanga metetdaksü.

Noklak district kübok Langnok yimtsüng nung Khamniungan kintem alir, kong medical facility densema nungdakba aika peria menguteter. Tesem tezü nung alir nürtem nem teyari agütsü aser tongtibangsa lisopurtem den tesendaktep tajungba yanglutsü nükjidong nung, iba camp ayongzük.

Iba medical camp nungi

tetsür 36 aser tebur 27 densema yimer 63 shi ajangzükogo. Nübur asoshi aria bilemja aser parnok nungdakba ajiteta teyari agütsüba asoshi Langnok yimtsüng nung tantsü-tambu, GB, Chairman aser sannükeri Assam Rifles dang pelaba metetdaksüogo.

Kasa anogo, HQ IGAR (North) kübok Assam Rifles indang Shamatore Battalion-i Shamatore jila nung World Contraception Day sentong ayonga agiogo.

Tetsürtem atema 'Contraception' dak sendakba tongtibangtem lisopur dang metetdaksü aser iba nung kümdangshia lidaktsü nükjidong nung iba sentong ayongzüka liasü.

CMO Shamatore Battalion, 2IC Jacob-i, Women's Health tebilemte balala nung ajemdaker Contraceptive kit amshiba yimya, tajangzük aser tenokdangba indang jembiogo.

Maneni, iba anogomung nungtem nung Assam Rifles-isa yimertem atema medical camp ka ayongzüka liasü.

Nürtemi contraception nung kümdangshia aser metetta lidaktsü asoshi medical awareness sentong katsüba atema lisopur den Shamatore Women's Society aser Sitala, Secretary Women dept of Police Baptist Fellowship Shamatore nungeri Assam Rifles dang pelaba metetdaksüogo, ta kasa sangdong nung shia lir.

Taküm Diwali mapang 'Sooryavanshi' sayatsü

Mumbai, Rongjui/September 26, 2021 (Agencies): Alima ajunga asingba coronavirus wara aser lockdown ajanga aiben thinena arur sülen, Rohit Shetty indang Sooryavanshi film ya taküm Diwali mapang theatre nung sayatsü sentong renemdar.

Taküm Diwali benjong ya November 04, 2021 (Brehostibar) nungi tenzüksü.

India tesem balala nung, Covid-19 talenbatem melungi salayonga aoba den, tawa Maharashtra Chief Minister Uddhav Balasaheb Thackeray-i sangdong ka ajanga, October 22, 2021 sülen, State nung cinema aser theater tem lapoktsü

melatsü, ta metetdakja liasü.

State nung theatre aser cinema tem lapokdaksütsü dak sendakba nung, Mumbai nung seden ka agia liasü, kong theatre balala nungi teshimtet nübtem, exhibitors aser Director-Producer Rohit Shetty denogo.

Honibarnü, Rohit Shetty-i social media ajanga iba senden nung lemtetba osang aser pelaba lemsatepa liasü.

"Chief Minister, Shri Uddhav Thackeray dang pelaba metetdaksür. October 22, 2021 nungi Maharashtra nung theatre tem lapoktsü. Taküm Diwali benjungmung mapang film sayatsü tebilemba

lir," ta Rohit-i lemsatep.

Rohit Shetty indang cop drama ya mezüngbo March 24, 2020 nung sayatsü renem. Ajisüaka, linük nung Covid tensa kanga mejungi küma aoba asadangteta, film yanglurtemi 2021 January ita sayatsü lemtet. Ano, Covid-19 wave tanabuba agi kongshiba yong, iba film sayatsü asoshi anogo melenshia arur sülen, taküm October tatemlen iba film sayatsü imlar.

Sooryavanshi, koba 'Singham' franchise ka asütsü, iba film nung Akshay Kumar aser Katrina Kaif den Ranveer Singh aser Ajay Devgn nungeri tongti shilem agiba angutsü.

13buba MAN nominee video tem YouTube nung angutsü

Dimapur, Rongjui/September 26, 2021 (TYO): 13buba Music Awards of Nagaland (MAN) 2021 indang nominee video tem MAN Youtube channel www.youtube.com/c/MusicAwardsofNagaland nung angutsü, ta sangdong ajanga metetdaksü.

Anungji, music sapur/jangrar temi agüja aliba website nung item music video reprangtetsü aser pei sapuba artist/band temi 'Song of the Year' award angutsü atema tereprangertemi item video reprangba ajanga nungitta yaritsü akok.

Iba award (MAN) sentong nung category balala kübok artist aser band tajungtiba nem award 17 tashi agütsütsü renema lir. Award 17 nungi 16 tashi judging panel ajanga

lemtetba ama category shia nung nomination tajungtiba nem agütsütsü.

Taküm Music Awards Of Nagaland (MAN) 2021 atema tetendanger temji, nungtugu actor, film director, producer, music director, composer aser taoba mapang VJ Luke Kenny den Nagaland nungi nungtugu musician ana dena lir. Judging panel asem rongnung, tetendanger tenüng anaprongla sentong achaayangertemi yakta metetdaksütsü.

Music Awards Of Nagaland (MAN) 2021 grand finale sentong ya October 16, 2021 (Honibar) nü RCEMPA, Jotsoma nung ayonga agitsü terenemba lir. Music Awards of Nagaland ya TaFMA ajanga teyari agüja Native Trax Society-i ayongzüksü, ta kasa sangdong nung shia lir.



Il Aier aser Lima Longchar nati züluba Mokokchung - The Swinging Sixties and Beyond ta sür kaket ka tsürabur M.B Longkumer (achichilen)-i yangi The Restaurant 2 Mokokchung nung sayatsüdang tangokba noksa nung angur. Iba kaket ya item dokantem - Black Berry's Showroom Dimapur, Woodland Handicraft Kohima, Made in Nagaland Kohima, Bible House Kohima, Assets Mokokchung nung angutsü. Mokokchung town, 26th September, 2021

Kohima DC ajanga 'No Parking Zone' atema metetdaksür

Dimapur, Rongjui/Sept. 26 (TYO): Regional Transport Authority ajanga taoba mapang sangdonga aliba melenshia aser nürtem ajangzüksü mechi, Deputy Commissioner & Chairman RTA, Kohima, Gregory Thejawelie NCS ajanga sangdong ka nung New NST nungi Khuochiezhie (Local ground) North Gate via Razhu Point tashi lenmang ya October 1, 2021 nungi tenzüka NO PARKING ZONE asütsü, ta metetdaksüogo.

Iba melena gari anena ayutsü atema City Centre site (Old MLA Hostel site) aser Khuochiezhie North Gallery area nung tesem agüja lir. Iba den külemi nürtem dang tsünglanglen shia aliba ama inyaktsü metetdaksüogo:

1. Taoba mapang No Parking area telungzük nung traffic permit tem agüja aliba magitsü.
2. Gari nungi osettsüset

agizüksü aser inoktsü ya aonung 8:00 ako nungi anepdang 6:00 ako tashi melatsü.

3. Anepdang 6:00 ako nungi aonung 8:00 ako tashi yimtung nung gari anena ayutsü memelatsü.
4. Traffic junga jajadaksütsü mechi Deputy Commissioner indang Office-i aitdak, Commissioner indang Office-i aitdak aser SBI bank entrance temalen gari anena ayutsü memelar.
5. Nisung anioktsü (pick up) aser yutsütsü (dropping) atema lenmang nung temaitsü yutsütsü.
6. City Centre parking-i MLA Junction nungi aitsü aser DC Office Kohima tsütsü nungi adoktsü.
7. Khuochiezhie parking nung entry aser exit ya North Gate alitsü.
8. Parking tesem nung temzüng aser ozüng balala alitsü.



Hokolbarnü, (September 24, 2021) Council Hall Mon kübok Social Welfare Department Mon-i "Converging towards a healthy walk through life" omen nung ajemdaker PoshanMaah 2021 sentong ayonga agiogo. Iba sentong nung, Supervisor, Mon Block, Ngupya Wangshu-i PoshanMaah indang nung jembi, kong 2022 küm tashi nungbo, tanurtem chiyongtsü peria achi-ajem masüba timtem/tebilemte ajemdaksütsü asoshi PoshanMaah nükjidong lir, ta pai metetdaksü. Iba sentong ajanga arishi küm 0-6 tanurtem, tanur tetsü aser tainlonglong tetsürtem ajangzükdaksütsü nükjidong lir, ta Ngupya-i shisem. Supervisor, Mon Block, L. Amei Konyak-i, Infant and Young Child Feeding (IYCF) indang nung jembi, kong tanur nem tetsü mamatzü shitak yongdaksüba aser iba dak sendakba tongtibangtem lai lemsatepa liasü.

Jyothi Surekha Vennam-i silver medal angu

WORLD ARCHERY CHAMPIONSHIPS



Rongjui/September 26, 2021 (Agencies): Honibarnü World Archery Championships Compound Women Individual final nung Colombia tsür Lopez makokba sülen India tsür Jyothi Surekha Vennam-i silver medal dang nguteta liasü. World Championship nung India nunger kati danga gold medal ngudanga mali aser taoba mapang trokben tashi silver medal ngugo.

Jyothi, shibai Hokolbarnü Compound Women's Team aser Compound Mixed Team asaya nung silver medal ngua liasü, la South Dakota nung final asayaba mapang compound section nung world No 1 asayar Colombia tsür la yagi 146-144 agi koka liasü.

Andhra Pradesh kübok Vijaywada nungi arishi küm 25 tain asayar, shibai final tonga kanga junga asayaa liasü la first

end sülen point ka (28-29) agi tesülen liasü. Lai 9 nung anaben aser 10 nung khen akha aser kasa mapang nung Sara-i 10 ka, X aser 9 nung khen kha liasü. Second end nung asayar anapronglia point 29 angu aser maneni Sara point ka agi timba liasü.

Tasembuba end nung Sara-i point 30 prongla ngutet aser Sara-i point 29 dang ngutet point ana agi tajemba aküm.

Pezübuba end nung lai maneni point ka lalua 29-28 agi makok. Lai pongububa aser tatembangbuba end bo akok saka point ana agi asaya makok.

Iba asayamung nung silver medal anguba ya Jyothi atema World Archery Championships nung tajungiba asayaba asütsü kechiyong lai silner medal asem ngutetogo.

Semifinal nung Jyothi-i Mexico tsür Andrea Recerra 148-146 agi akok. Quarter nung lai 150-144 agi Croatia tsür Amanda Mlinaric tsükdaktsü.

Leslie SC East Bengal nung denogo

Kolkata, Rongjui/September 26 (Agencies): English Premier League club Chelsea indang taoba goalkeeping coach Leslie Cleevly, SC East Bengal nung denogo, ta club sangdong ka ajanga Deobarnü metetdaksü.

Bangladesh senior national team coach mapa inyakba sülen Cleevly tang coach Manuel 'Manolo' Diaz indang coaching team nung denogo.

"Ni iba tesem temeket nung inyakba tajangshiba lir. Bangladesh national team setup nung ni shilem agiogo kong fan temi football asaya kanga sakloka pusemer, anungji ni nüburtem taginüba angateter. SC East Bengal ya club tulu ka aser iba club nung densemba atema kanga pelar," ta Cleevly-i ashi.

"Club nung züngoksema aliba goalkeeper tem dak sendakba nung ni kidang ken o ajak bushisingdangogo aser parnok tajungba asayadaksütsü atema ni takokba tashi inyaktsü. Goal keeper asemprongla experienced lir aser parnoki takok ngua asayatsü ta amanger," ta paisa ashi.

SC East Bengal nung iba season atema goalkeeper tem asemji Arindam Bhattacharya, Sankar Roy aser Suvam Sen lir. Cleevly ya UEFA 'A' Licence holder ka lir aser pa küm 20 dak tema coach mapa inyaka arudar. Pa 1997 küm Milwall FC nung career tenzük.

1999 nungi 2002 tsüingda

pa Fulham FC nung Edwin van der Sar aser Maik Taylor na den inyakogo aser iba sülen pa Crystal Palace-i ao, kong pa Steve Kember kübok first team goalkeeper coach aser academy goalkeeper coach aküm.

Arishi küm 56 tain coach ya Tottenham Hotspur academy goalkeeper coach liasü aser iba sülen 2007 küm Chelsea-i ao, kong pa küm pezü tashi inyaka liasü.

Chelsea nung pai, Petr Cech, Carlo Cudicini aser Hilario nunger nem teyari agüja liasü. Maneni pa 2020 küm Bangladesh-i mao tsüingda Carshalton Academy nunga inyaka liasü.

Asayar ka ama pa Southampton, Crystal Palace aser Notts County nungi asayaogo. Pa England nung non-League football, senior level nung asaya 1000 ka dak tema nung asayaogo. Cleevly-i Carshalton Athletic nungi asayaba mapang player of the year pezüben tashi anguba den takok maroka aika koktetogo. Iba team ya pa lenisüba nung asaya 100 dak tema asaya liasü.

Bangladesh national team nung Cleevly-i Bobby Mimms melen. Mimms ya taoba season nung SC East Bengal nung Robbie Fowler indang backroom staff ama dena liasü. Tang Cleevly-i Mimms melenogo.

Indian Super League 2021-22 season nung November 12 nü SC East Bengal team Jamshedpur FC den asayaa tenzüktsü.

Mandhana aser Sharma na Sydney Thunder nungi asayatsü



Smriti Mandhana

Deepti Sharma

Rongjui/September 26, 2021 (Agencies): India tsürtem rongungi Smriti Mandhana aser Deepti Sharma na taruba Women's Big Bash League (WBBL) nung asayatsü. Tenaprongla defending champions Sydney Thunder-i anisemogo. WBBL ya taruba ita tenzüktsü.

Tena tang Australia den asayaa aliba India team nung züngoksema lir aser iba asayamung tembangba sülen October 14 nü nungi tenzüka asayatsü aliba asayamung atema kidangi meyipa marui renemshi tenzüktsü.

Left-handed opener Mandhana-i Mackay nung tanabuba ODI asayaba mapang ball 94 nung run 86 yanglua liasü.

Kasa mapang nung arishi küm 25 tain Mandhana ya WBBL nung Hurricanes aser Brisbane Heat nungi asayaogo ajisiüka Deepti atema iba ya tang mezüingbuba asayamung asütsü.

Sydney Thunder coach

Trevor Griffin-i Deobarnü ashiba agi, India nunger asayar ana anisemba sülen par team title defend asütsü atema jenjang tajungba kümogo.

Griffin, shiba Mandhana den England nung inyakogo, pa left-handed opener ya par team nung züngoksema atema kanga pelar.

"La world class asayar ka lir," ta Griffin-i Mandhana indang jembidang ashi. Lai 2018 küm ICC Women's Cricketer of the Year award nguogo.

Mandhana-i, iba asayamung ajanga asaya yimya tali angazüktsü imlaba lemsatepa liasü.

"Bendanglen asayaba ajanga aser talisa T20 format nung asayaba ajanga tajangshiba tajung agika agütsür," ta arishi küm 25 tain asayari ashi.

"Alima ajunga nungi asayar tem adenshir kati ka den tajangshibatam lemsateper, anungji aika angazüker. Jangrademtsü atema masü

saka ni iba maongka ya angazüktsü atema aser pressure nung asayatetsü asoshi yimyasübatsü atema asayar, kechiyong international cricket asayaba mapangang item ya angazüker," ta lai ashi.

Maneni Coach Griffin-isa, England skipper, Heather Knight-i tawa toktsüba ya Deepti-i süngdaksütsü, ta ashi.

Knight, shibai taoba season WBBL nung Thunder nungi kanga junga asayaogo, la takümbo iba asayamung nung masayatetsüsa aküm.

"Heather team nung mezüngoksema atema tezüdanga bilemer, ajisiüka la melentsü pur shimtsü süra aji Deepti asütsü, la star ka lir," ta Griffin-i ashi.

Deepti-ia, Thunder's squad nung züngoksema atema kanga pelaba lemsatep."Ni tang mezüingbuba WBBL nung asayatsü anungji ni kanga yongyaa atar," ta lai ashi.

"Kü nem taoba mapang nunga maongka agütsüogo, saka ni masayatet kechiyong iba mapang nung onok bendanglen oa asayatsü liasü. WBBL nung asayatsü maongka anguba ya India women's cricket atema kanga tulu lir," ta lai ashi."

Sydney Thunder pur iba asayamung nung mezüingbuba October 16 nü Adelaide Strikers den Blundstone Arena, Hobart nung asayatsü.

Stimac-i SAFF atema India nunger asayatem sangdongogo

Rongjui/September 26, 2021 (Agencies): India tebur senior national team head coach Igor Stimac-i Deobarnü taruba SAFF Championship atema asayar 23 tenung sangdongogo. Iba asayamung ya Maldives nung October 1 nü tenzüktsü aser October 16 nü tembangtsü.

Asayartem aser support staff tem Hombarnü Bengaluru nung ajuruteptsü aser Mongolbarnü Maldives-i aotsü. Stimac aser tanga technical staff tem kasa anogo Maldives nung squad den longjemtsü.

India dak alia Bangladesh, Nepal, Sri Lanka aser Maldives nungeri iba asayamung nung shilem agitsü. Team ajak khen khen asayatsü aser point timtiba ngutetba team ana final

asayatsü.

India team-i SAFF Championship (taoba mapang SAARC Cup) ya tenetben koka lir. India team-i 1993 küm Lahore, 1997 küm Kathmandu, 1999 Margoa, 2005 küm Karachi, 2009 küm (U23 squad) Dhaka 2011 küm New Delhi aser 2015-16 küm Thiruvananthapuram nung iba asayamung koka lir.

Iba asayamung nung India team October 4 nü Bangladesh den mezüingbuba asayaa tenzüktsü.

India team asaya mapanglem:

October 4: Bangladesh vs India (IST 4.30pm).

October 7: India vs Sri Lanka (IST 4.30pm).

October 10: Nepal vs India (IST 8.30pm).

October 13: India vs Maldives (IST 8.30pm).

BILEMDANGANG

"Yimjung aser tesunep melira rongsen akaba ajak amajok."